

Column Gradus Klèts

PEERD

Zon tien jaor geleien kwamen 't college en de raodsleden van Olde Iesselstreek terug van 'n schoolreisje naar Amsterdam. Ze zeiden toen dat ze van 't DRU-complex net zoiets wolen maken as 't cultuurpaleis Westergasfabriek. Ik schreef toen dat luj die meenden dat dat kon de goodwies kapot hadden. In 'n plèetske waar nog gin trein stopt moj met beide vuut op de grond



blieven. Ik was toen negatief en ik durfde niks. Van ander-mans centen durf ik alles. Ik veurspelde dat dit financieel gierend uut de klauwen zol lopen. Ik was 't dus helemaal ens met 't comité "Bezörgde Burgers" dat dit ook op de klompen kon anvulen en 't ook nog is op papier anteunde. Nee, 't zol de gemeente nog gin dri-j miljoen kosten. De heren hadden gold in hun hendjes. Inmiddels zun wi-j tien jaor wieter en bliekt 't DRU-industriepark 'n zeperd van jewelste den de gemeenschap al zeker 33 miljoen het gekost en nog heel lang heel vol miljoenen zal kosten. De meest verantwoordelukke wetholders zun al geheel of gedeelteluk vertrokken. Zi-j kosten de gemeenschap nog slechts wachtgeld. Das altied nog goedkoper dan 't naojagen van dreumen die nachtmerries blieken te zun. Toegegeven, 't zat ook vies tegen. Deur de crisis gingen ze veural de mist un umdat d-r honderd huzen minder verkocht werden op 't industriepark. Dat ze meenden dat verenigingen 'n forse huur zollen opbrengen en dat ook de exploitatie flink wat geld in 't lèèdje bracht is gewoon 'n gebrek an visie. Ze hadden in ieder geval van te veuren bi-j de verenigingen kunnen vraogen of zi-j zovol wel konden ophoesten. Töt oavermaat van ramp mag d-r weagens geluudsoverlast nog maor de helft van de evenementen plaats vinden. Dat betekent daj 'n hoge exploitatiewinst helemaal op de boek kunt schrijven. 't Wudt now min of meer 'n heel duur veredeld dorpshuus. 't Meeste spiet hek nog met de thans verantwoordelukke wetholder Peter van de Wardt. De beste man het amper part noch deel an de zeperds. Hi-j krig now echter wel de volle laag. Peter zol 't liefst 'n streep onder de DRU zetten. Dan kan hi-j vergeaten want 't zal hum blieven achtervolgen. Dat wudt trekken an 'n dood peerd waar jaorluks zeker twee miljoen bi-j mot. Terwijl 'n blind peerd tien jaor geleien al had kunnen zien dat zon opzet van 't DRU-complex absoluut neet kon.